

sum cadere ex illa quæ in fine adjicitur reservatione : *Salvis nobis & heredibus nostris iustitiis, libertatibus, & Regalibus nostris.* Sed hæc extra callem.

Iam inde à Ioanne Anglorum Reges Hibernie Domini dicti fuerunt, donec Henricus Octavus patrum memoriâ in Hibernicis Comitibus Hiberniæ Rex ab insulæ ordinibus declaratus fuit, quod quibusdam seditiosis Domini nomen non perinde ac Regis sanctum & verendum videretur. Hoc autem Regni Hibernie nomen & titulus Pontificia autoritate confirmata fuerunt (cum Maria Regina CIO DLV. regni Angliæ nomine obedientiam per legatos Romano Pontifici Paulo Quarto detulisset) hisce verbis : *Ad Dei omnipotentis laudem & gloriam ac gloriosissimæ ejus genetricis Virginis Maria, totiusque curiæ celestis honorem & fidei Catholice exaltationem, Philippo Rege & Maria Regina nobis super hoc humiliter supplicantibus, de fratrum nostrorum consilio & Apostolica potestatis plenitudine Apostolica auctoritate Regnum Hibernie perpetuo erigimus, ac titulo, dignitate, honore, facultatibus, juribus, insigniis, prærogativis, antelationibus, præminentibus regibus, ac quibus alia Christi fidelium Regna utantur, potiuntur, & gaudent, ac uti, potiri, & gaudere poterunt, in futurum insignimus & decoramus.*

Cum autem in illorum nobilium nomina inciderimus, qui primi Anglorum Hiberniam aggressi sunt, & fortissime sub imperium Anglicum subjunxerunt : ne illis, & eorum posteris hanc gloriam invidisse videamur, ex Hiberniæ (ut præ se fert titulus) Cancellaria apponam.

Qui venerunt cum Dermicio Murchardi filio in Hiberniam.

Richardus Strongbow Comes Penbrochiæ, qui ex Eva Murchardi Reguli Hibernici filia unicam progenit filiam, quæ Guilielmo Marefcallo Penbrochiæ Comitatus titulum cum latifundiis in Hibernia attulit, & numerosam prolem, quinque scilicet filios qui sibi serie quadam successerunt sine prole omnes, totidemque filias quæ Hugonem Bigod Comitem Norfolciæ, Guarinum de Montecanisio, Gilbertum de Clare Comitem Glocestriæ, Guilielmum de Ferrariis Comitem Derbiæ, Guilielmum Breose maritos liberis honoribus & possessionibus locupletarunt.

*Robertus Stephanides.
Herveus de Monte-Marisco.
Mauritius Prendergest.
Robertus Barrensis.
Meilerius Meilerinus.
Mauritius filius Giraldi.
Redmundus nepos Stephani.
Guilielmus Ferrandus.
Milo de Cogan.
Richardus de Cogan.
Gualterus de Ridensford.*

*Gualterus & filii Mauriti Giraldi.
Alexander
Guil. Notte.
Robertus Bernardi filius.
Hugo de Lacio.
Guilielmus filius Aldelmi.
Guilielmus Macarellus.
Hunfredus Bobum.
Hugo de Gundevilla.
Philippus de Hastings.
Hugo Tirellus.
David Gualensis.
Robertus Poërius.
Osbertus de Herlotera.
Guilielmus de Bendenges.
Adam de Gernex.
Philippus de Breos.
Griffinus Stephani nepos.
Radulphus Stephani filius.
Gualterus Barrensis.
Philippus Gualensis.
Adam Herefordensis.*

Quibus ex Giraldo Cambrensi adjungi possint,

*Ioannes de Curcy.
Hugo Contilonensis.
Redmundus Cantimorensis.
Redmundus Hugonides.
Milo Menevensis, & alii.*

Regni Hibernie administratio.

EX quo Hibernia Anglici juris facta fuerit Reges Angliæ eo Proreges ad rempublicam gerendam transmiserunt, quos primum *Hiberniæ Proreges.* Custodes Hiberniæ, deinde pro arbitrio Hibernie Iustitarios, Locum tenentes, & Deputatos vocarunt in Codicillis, sive Literis illis Patentibus, quibus eis autoritas & jurisdictio mandatur. Quæ sane ampla & regia, videlicet bella gerendi, pacem componendi, magistratus & munia omnia præter paucula conferendi, crimina præter quædam læsæ Majestatis remittendi, Equites auratos creandi, &c. Hæc *Literæ Patentibus* cum Magistratum quis init publice præleguntur, & juramento coram regni Cancellario, concepta verborum formula præstito, gladius qui præferatur, in manus traditur, in folio locatur, adstantibus regni Cancellario, qui sunt à sacro consilio regni Proceribus, cum Rege *Armorum, Serviente ad Arma,* & aliis honorariis ministris. Nec alius sane est in orbe Christiano Prorex qui propius ad regiam majestatem sive jurisdictionem, sive auctoritatem, comitatum, & apparatus spectes, accedat. Illi in consilio adsunt Regni Cancellarius, Regni Thesaurarius, & alii ex Comitibus, Episcopis, Baronibus & Iudicibus qui sunt à sanctiori consilio. Nam eosdem plane Ordines habet Hibernia quos Anglia, scilicet *Ordines Hiberniæ.* Comi-